

圖書集成
三編

中華道藏

華夏出版社

十五『國家重點圖書出版規劃項目』

主編 張繼禹

本冊主編 陳耀庭

中華道藏

第四三冊

華夏出版社

目錄

001 敦煌本靈寶金錄齋儀(擬)	一
002 金錄齋啓壇儀(杜光庭集)	七
003 金錄齋懺方儀(杜光庭集)	一一
004 金錄大齋宿啓儀	一四
005 金錄大齋啓盟儀	一六
006 金錄大齋補職說戒儀	一八
007 金錄早午晚朝儀	二一
008 金錄解壇儀	二八
009 金錄齋投簡儀(張商英編)	三〇
010 金錄齋三洞讚詠儀(張商英編)	三四
011 金錄設醮儀	四三
012 金錄齋放生儀	四六
013 金錄祈壽早午晚三朝儀	四八
014 金錄上壽三獻儀	五四
015 金錄延壽設醮儀	五六
016 金錄玄靈轉經早午晚行道儀	五九
017 金錄十迴度人早午晚朝開收儀	六八
018 金錄十迴度人三朝轉經儀	七八
019 玉錄資度宿啓儀	八八

020 玉錄資度解壇儀	九一
021 玉錄資度設醮儀	九四
022 玉錄資度早午晚朝儀	九七
023 玉錄生神資度轉經儀	一〇三
024 玉錄生神資度開收儀	一一三
025 玉錄三日九朝儀	一一九
026 玉錄濟幽判斛儀	一三五
027 太上黃錄齋儀(杜光庭編)	一三九
028 无上黃錄大齋立成儀(蔣叔輿編)	三二六
029 黃錄救苦十齋轉經儀	六六七
030 黃錄十念儀	六七四
031 黃錄五老悼亡儀	六七六
032 黃錄齋十天尊儀	六七八
033 黃錄齋十洲三島拔度儀	六八一
034 黃錄九幽醮無碍夜齋次第儀	六八五
035 太上靈寶玉匱明真齋懺方儀(杜光庭修)	六九五
036 太上靈寶玉匱明真齋懺方儀(杜光庭修)	六九八
037 太上靈寶玉匱明真齋言功儀(杜光庭修)	七〇一
038 洞玄靈寶八節齋宿啓儀	七〇七
039 洞玄靈寶自然齋戒威儀經(擬)	七一〇
040 洞玄靈寶自然齋儀	七一六
041 洞玄度靈寶自然券儀	七一九
042 靈寶半景齋儀	七二二

001 敦煌本靈寶金錄齋儀(擬)

經名：敦煌本靈寶金錄齋儀
(擬)。撰人不詳，約出於唐初。
《正統道藏》未收。底本出處：
1、日本國會圖書館藏 WB32
(3) S.3701 P.2989 抄本。11、
P.4652 P.4965 抄本。

敦煌本靈寶金錄齋儀書之一

據日本國會藏本 WB32(3)、
S.3701 P.2989 合校

金錄晨夜十方儀

伏聞三錄開圖，元陽敷七品之格；五老啓運，真人演八帝之儀。是知太上宴遊，必佇齋而晏駕；天尊說教，亦資供而迴鸞。伏惟齋功，無乎不被。謹有大唐皇帝，纂慶紫微，祥雲浮

帝座之色；繼明皇極，真星朗金鏡之輝。垂衣裳而天下安，抱道德而乾坤靜。猶恐萬邦失化，一物有違，迺肅神儀，歸誠^①至道，設河圖之大醮，建金錄之清齋。臣等謹爲皇帝，依上元金錄簡文明真上宮科品，建立黃壇，法天象地，敢披玄蘊，敷露真文，并賁龍璧紋繒，歸命東方無極太上靈寶天尊、九氣天君、東鄉諸靈官。今故立齋，燒香燃燈，朗耀諸天。願以是功德，歸流皇帝七廟尊靈，九祖照^②穆，即得開度，身入光明。願皇帝緝成天地，彈壓山川，演道德而爲經，敷仁義而成緯，龜龍效祉，鸞鳳呈祥，歲阜瓊儲，時和玉燭。胡塵北靜，廓鴈海而澄波；蠻徼南清，偃鳶郊而卷霧。三光調理，五緯順常，帝道興隆，萬姓安樂。今故云云。

伏聞朱陵渺邈，疏三氣以疑真；丹峙依稀，道九炎而演聖。莫不功包六極，開六度以延祥；道冠三微，掩三元而薦福。天子修之以致化，國祚享之以太平。謹有大唐皇帝，稟大道之神器，挺至德之靈符，系伯陽之仙蹤^③，

扇無爲以育物。仰慮德澤猶闕，政教未敷，罔以自寧^④。恭修齋醮，式憑景貺，庶獲冥扶。臣等謹爲皇帝，依上元金錄簡文明真陽宮科品，建立黃壇，法天象地，敢披玄蘊，敷露真文，并賁龍璧紋繒，歸命南方無極太上靈寶天尊、三氣天君、南鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝承天理地，應聖通神，風雨以時，候三農而表貺^⑤，陰陽不爽，順四序以調年。君臣叶同德之誠，遐邇獲乂安之福^⑥，日含五色，月吐十枝，尉侯長消，干戈永戢。三光調理，五緯順常，「帝」道興隆，萬姓安樂。今故云云。

伏聞琅玕境內，金門開七氣之儀；鬱察山中，玉相湛三玄之座。金臺王母，高臨太素之庭；玉闕真妃，宴衍少陰之府。引含生於淨域，延妙祉於鄴都，安國寧家，莫尚金錄。謹有大唐皇帝，負圖大寶，纂承丕業，則天地而育群生，法日月而臨萬寓，猶恐無爲

之風凌替，道德之化未敷，不以尊極自高，每以歸依在命。臣等謹爲皇帝，依上元金籙簡文明真右宮^⑦科品，建立黃壇，法天象地，敢披玄蘊，敷露真文，并賁龍壁紋繒，歸命西方無極太上靈寶天尊、七氣天君、西鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝至道格於乾坤，深仁冠於上聖。固水幽陵之北，并慕淳風；浮石炎火之南，無思不服。國富千箱之積^⑧，家盈萬庾之儲，黃龍薦溫洛之圖，玄龜送永昌之籙。三光調理，五緯順常，〔帝〕^⑨道興隆，萬姓安樂，今故云云。

伏聞五帝分司，玄冥闡北方之教；百神辯位，登君典恒岳之圖。玉壘玄丘，截陰方而作固；金城紫堞，鎮坎陸而遙通。寶相端儀，獨步三清之城；金真撫化，高居五氣之天。開玉遺^⑩而救囚魂，長徒披散；懸寶珠而度群品，國祚安寧。謹有大唐皇帝，膺符執紀，撫運承天，包括萬區，抑揚六合，

猶恐玄機未爽，庶類招愆，常懷肝食之憂，每軫汾陽之念。臣等謹爲皇帝，依上元金籙簡文明真太陰宮科品，建立黃壇，法天象地，敢披玄蘊，敷露真文，并賁龍壁紋繒，歸命北方無極太上靈寶天尊、五氣天君、北鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝聖化被於八宏，玄恩覃於萬寓，國祚隆於億載，家治富於千箱，四海澄清，九河無浪。鳳不虛至，必解銜書；龍不徒來，還能負卦。三光調理，五緯順常，帝道興隆，萬姓安樂。今故云云。

伏聞梵元舒彩，儼仙衛於扶搖；安寶凝輝，放神光於艮域。濟營魂於北落，引滯識於南昌，福被幽明，功包造化，至誠斯應，妙感必符，護國安人，歸心梵府。謹有大唐皇帝，御籙圖於黃屋，負翠宸於紫微，握金鏡以正天綱，執玉衡而齊地紀。既荷玄元之德，思報廣成之恩，賁金帛以盟心，憑齋醮而申謝。臣等謹爲皇帝，依上元金籙

簡文明真左宮科品，建立黃壇，法天象地，敢披玄蘊，敷露真文，并賁龍壁紋繒，歸命東北無極太上靈寶天尊、梵氣天君、東北鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝聖躬安豫，大禮聿修，吞虞夏於胸中，運商周於掌內，三農有積，九穀無饑，獸呈六足之奇，麟送五蹄之異，要荒靜浸，邊塵不驚，尉侯無虞，乾坤明觀。三光調理，五緯順常，帝道興隆，萬姓安樂。今故云云。

伏聞梵氣冲融，太上闡玄微之旨；真精恍惚，天尊開救苦之詞。故揚化九幽，迴出上清之府；通符萬象，高居太素之庭。駐流景於邪山，極逝川於浚壑，成而不宰，用而莫知，輔國度人，代代靡絕。謹有〔大唐〕^⑪皇帝，握靈圖而臨宇宙，御寶歷而統蒼生，不以九五爲高，每以尊崇大道，佇斯冥祐，助牧氓黎。臣等謹爲大唐皇帝，依上元金籙簡文明真下宮科品，建立黃壇，法天象地，敢披玄蘊，敷露真文，并

賁龍壁紋繒，歸命東南方無極太上靈寶天尊、梵氣天君、東南鄉諸靈官。今故立齋，燒香燃燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝德包萬寓，澤漏三泉，五岳無塵，四海澄浪，乾坤效祉，宗社降靈，銜書之鳳來儀，負圖之龍再躍，恩沾動植，化被含生，紅粟積於京垣，瓊儲實於君於^①倉稟。三光調理，五緯順常，帝道興隆，萬姓安樂。今故云云。

伏聞紫府開圖，示明真之典式；黃籙定簡，演靈寶之科彰。十四之罪條通，九幽之懺啓請。鏡花含象，流輝東北之方；褰樹浮光，散影西南之土。實衆妙之逾妙，迺重玄之又玄，標天地之元根，爲帝王之楷式。謹有大唐皇帝，運天策而安九鼎，杖神威而靜萬邦，道類崆峒，德齊姑射，猶恐政乖淳化，德爽上皇，恩崇金籙之齋，以謁玉晨之帝。臣等謹爲皇帝，依上元金籙簡文明真下宮科品，建立黃壇，法天象地，敢披玄蘊，敷露真文，并賁龍壁紋

繒，歸命西南方無極太上靈寶天尊、梵氣天君、西南鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝德風遐被於西海^②，道化彌流於八宏，窮九變之精奇，行五德之盛禮。春風普扇，禾不驚篠；夏雨遍霑，田無破塊。丹甑浮彩，式表於年和；銅雀飛音，爰彰於歲稔。三光調理，五緯順常，帝道興隆，萬姓安樂。今故云云。

伏聞玉寶司方，耀仙姿於梵府；瑤真問罪，佇靈煦於陰宮。莫不妙闡玄符，光敷道印，返^③四迷於上善，度十苦於中天。廿四生啓瑤圖而薦福，八十一好含瑞景而通幽。變鳳曆之鴻基，翊飛龍之景運。謹有大唐皇帝^④，玄精啓曆，鼎運克^⑤昌^⑥，挺埴百王，範圉千古。處青蒲之上，有功於乘奔；居黃屋之下，無忘於齋醮。臣等謹爲皇帝，依上元金籙簡文明真太陰宮科品，建立黃壇，法天象地，敢披玄蘊，敷露真文，并賁龍壁紋繒，歸命西北方無

極太上靈寶天尊、梵氣天君、西北鄉諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身入光明。願皇帝聖曆永昌，皇風遐振，靜符萬福，動合千祥，三晨會銅雀之鳴，五緯叶珠囊之度，邊烽息焰，炎微歸淳，帝道興隆，萬姓歡樂。今故云云。

伏聞乾宇重光，秘九闕而獨化；星宮積耀，敞三洞而高居。玉都列無上之尊，瓊簡演大乘之教，卅二帝拱璿極而津梁，廿八天御碧空而輔化，神功潛運，幽讚邦家。謹有大唐皇帝，受命昊天，君臨四海，道參三大，德並二儀，但恐道不常夷，時或屯蹇，憂虞在念，怵惕居心，伏冕歸誠，虔修齋醮。臣等謹爲皇帝，依上元金籙簡文明真上宮科品，建立黃壇，法天象地，敢披玄蘊，敷露真文，并賁龍壁紋繒，歸命上方無極太上靈寶天尊、卅二天帝君、玉京玄都紫微上宮真人、玉女神仙諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭

穆，即得開度，身入光明。願皇帝明齊日月，德摠乾坤，聖祚無疆，邁宗周之七百；鴻基永固，超大漢之二京。九穀豐登，車書混一，萱階薦祉^①，芝檻疏禎，獸解觸耶，草能指妄，兵甲靜息，疆場晏安，六合無虞，八宏有泰。三光調理，五緯順常，帝道興隆，萬姓安樂。今故云云。

伏聞大靈播象，資方岳以裁形；大物混成，仰坤維而厚載。神功靡測，含元配得一之先；潛化難明，紐極鎮生三之首。匡扶九五，亭毒百昌，大造神功，羌難縷說。謹有大唐皇帝，資聖握圖，承明御曆，道高千古，德跨百王，但以代隔淳風，猶傾宰戮；時乖弃智，尚假刑名。良恐獄訟之中，傷殺非理；宇宙之內，撫育失和。所以憑寄百靈，歸依三寶，奉營齋醮，幽贊皇猷。臣等謹爲皇帝，依上元金籙簡文明真下官科品，建〔立黃壇，法天象地，敢披玄蘊，敷露真〕^②文，并資龍壁紋繒，歸命下方無極太上靈寶天尊、九土玉皇、四司五帝、十二仙官、五岳四瀆九宮真

人、神仙玉女、九地諸靈官。今故立齋，燒香然燈，朗耀諸天。願以是功德，歸流皇帝七廟尊靈，九祖昭穆，即得開度，身〔入〕^③光明。願皇帝盛德方於造化，鴻業冠於遂初，國序彝倫，身識榮茂，神芝吐秀，曆草抽英，陰陽和而風雨時，兵戈戢而候烽靜。三光調理，五緯順常，帝道興隆，萬姓安樂。今故云云。

金籙齋十方懺文

竊以金輝竦構，玉寶司方，凝神大有之宮，步影崇虛之室。通符萬象，高臨太素之庭；揚化九圍，迴出上清之府。謹有大唐皇帝，欽承寶曆，俯御璇璣，恒憂帝德未敷，天心不合，百寮承負，二儀垂譴，致使陰陽爽度，水旱僭和，夙夜懷憂，靡知祈告^④，思崇道祐，濯累玄都。謹資龍繒綾壁，求乞哀救，國界兆人。臣等謹承綸旨，敢開玄蘊，披露真文，歸命東方無極太上靈寶天尊、九炁天君、東鄉諸靈官。今故立齋，燒香燃燈，上謝天地，消諸不祥，福流七廟宗祧，普入光明，乘遠豫於鸞

驂，薦飛名於鳳舟。伏願皇帝聖祚遐延，鴻基永固，風雨調而玉燭明，四氣和而陰陽順，萬邦享化，百寮同德，寰瀛有截，咸果正真；率土無虞，普天齊濟。今故燒香，自歸君大聖至真之德，得道之後，與真合同。〔今故云云〕^⑤。

竊以成天秘景，高居有象之尊；玉闕流光，旁聞無名之道。故能包上清而演化，列聖於是登真；浹下界而甄風，群靈由之踐妙。謹有大唐皇帝，承九玄之眷命，奉億載之宏圖，仰恐政未殷情，塵多犯□^⑥，玄天告譴，致使疫厲流行，陰陽僭度，帝王兢惕，思樹福田。臣等敬披玄蘊，敷露真文，投命南方無極太上靈寶天尊、三炁天君、南鄉諸靈官。今故立齋，燒香然燈，上謝天地，消諸〔不祥，福〕^⑦流七廟，普入光明，薦金液而澄神，奉□□□□^⑧相。〔伏願〕^⑨皇帝鳳歷遐延，龍圖永固，茫茫兆庶，蠢蠢生靈，咸趨真遊，同歸正始。今故云云。

竊聞洞景遙臨，總三元之秘策；太微上闕，控八會之真筌。馭氣金臺，

引含生於淨域；乘霞瓊室，延妙祉於玄都。謹〔有〕²⁴大唐皇帝，忝承寶曆，重啓大唐，馭國若履深泉之（以下缺）

敦煌本靈寶金錄齋儀書之一

- ①「誠」字原本殘損，據殘字擬補。
- ②「照」字當作「昭」。
- ③P. 2989 從此行「蹤」字開始。較國會藏本缺24行。
- ④「罔」字，國會藏本及P. 2989 均寫作「罔」，據前後文義改正。
- ⑤「乂」字，國會本及P. 2989 均寫作「乂」，據前後文義改。
- ⑥「帝」字，國會本及P. 2989 均缺漏，據前後文補。
- ⑦右宮：原誤作「右官」。
- ⑧國會藏本止於上行「國富千箱」。
- ⑨以下用P. 2989 為底本。
- ⑩「遣」字當作「置」。
- ⑪「大唐」二字原缺，據前後文補。
- ⑫「君於」二字疑係衍文。
- ⑬「西」字當作「四」。
- ⑭「返」字原誤作「級」。
- ⑮S. 3071 寫本起於此行。
- ⑯「昌」字，P. 2989 原缺，據S. 3071 補。
- ⑰S. 3071 止於上行「萱階薦」。
- ⑱原本此處漏抄一行。括號中文字係據前後文擬補。
- ⑲「入」字原缺，據上下文補。
- ⑳後「告」字當係衍文。

②「今故云」四字，原本缺，據前後文補。

②「犯」字下，疑漏抄一字。

③「不祥，福」三字，原本殘損，據前後文擬補。

④原本此處殘損四字。

⑤「伏願」二字原本漏抄，據前後文擬補。

⑥「有」字原本漏抄，據前後文補。

敦煌本靈寶金錄齋儀書之二

（P. 4652 抄本，前缺）

一念上香云云。願以是功德，歸流皇帝、皇后。伏願金鏡與二耀俱明，寶歷共兩儀同固，道階至聖，德偶大仙，澤洽三農，恩流四面，人知禮節，國致升平。皇后識冠柔儀，名高內範，禮拔攢秀，敷令則於丹幃；行葉流芳，振休聲於彤管。

三念上香云云。願以是功德，歸流皇太子、諸王、諸公主。伏願韞嘉瑞於雲丘，契祥期於風澤，至孝光於三善，明德茂於重離。諸王叶軒風而誕秀，應趨日以資靈，業濟屯雷，功宣作礪。諸公主性道希夷，言容婉秀，柔儀桂馥，懿範蘭薰，芳規超萬古之前，峻躅映千齡之後，槐司罄其臣節，棘署盡其忠規。臣等幸叨上善，隨報下生，忝籍良緣，預蒙提獎，遂得身參玉篆，體佩金篇，宣詞於七寶之壇，奏聞於九仙之扃。但以道尊德貴，識暗材疏，濫職

當仁，喜懼交集。

今謹有臣等，以今第三日寅時，爲國修齋，昇壇行道。伏奉帝旨，開告天曹。遂得霞堂煥彩，參差注其九光；雲宮寫照，掩映含其五色。謹以初念上香云云。願以是功德，歸流皇家，陵廟仙儀，宗祧神識。伏願蓬山煮影^①，襄野遊神，驂白鳳於崑丘，控青虬於姑射。二念上香云云。願以是功德，歸流皇帝、皇后。伏願應紫微而出震，御綠錯而登朝，德冠五龍，聲高九駿，八仙效職，四裔響威，光景所臨，遠照燭龍之野；車書攸括，遙通火鼠之鄉。皇后毓質異宮，資靈兌域，閑襟（以下缺）

（P.4965 抄本，前缺）

天地不仁，荷明聖之恩，則帝王何力。遂得班名羈鳳，偶迹驂鸞，承此至誠，用申虔謁。今謹有臣等，以今第四日午時，爲〔國〕^②修齋，升壇行道，伏奉帝旨，開告天曹。遂得露液凝甘，近列^③上清之府；烟香汎色，遙浮太素之庭。謹以初念上香云云。願以是功

德，歸流皇家，陵廟仙儀，宗祧神識。伏願高步三清，遙辭五濁，坐琳房而納豫，蔭褰樹而延祥^④。二念上香云云。

願以是功德，歸流皇帝、皇后。伏願壽契仙京，年逾至極，響明南面，超遠祚於青元；居正北辰，越修期於碧落。均兩儀而永泰，歷萬劫而常安，丹穀含芳，表千箱而入詠；白環攜耀，光萬宇而來王。皇后麗娥庭而著範，鏡似幄以揚芬，令德時新，柔風日暢。三念上香云云。願以是功德，歸流皇太子、諸王、諸公主。伏願金昭表德，玉裕端華，睿識虛融，天姿迴秀，啓明兩之重曜，綜知十之宏才。諸王別派咸池，分柯若木，虔外闡而惕慮，問內豎而兢憂。諸公主降精負耀，彩綢靈娥之宮；瑩質方流，光藻宓妃之館。多士飛誠璿極，群公振彩璧門。臣等帝王葛狗，草澤昆蟲，志守莊筌，元嬰魏綱，功慙映雪，業謝握錐，濫荷驅馳，唯增飲愧。今謹有臣等，以今第四日亥時，爲國修齋，昇壇行道，伏奉帝旨，開告天曹。遂得霓裳搖袞，羽客來翔，雲旆

逶迤，真童戾止。謹以初念上香云云。願以是功德，歸流（以下缺）

敦煌本靈寶金錄齋儀書之二

①「煮」字似當作「翫」。

②「國」字原本漏抄，據前後文補。

③「列」字似當作「冽」。

④原抄本「祥」字下，疑缺字。

（王卡點校）

002 金錄齋啓壇儀

廣成先生杜光庭集

經名：金錄齋啓壇儀。一卷。
唐末五代杜光庭集。底本出處：《正統道藏》洞玄部威儀類。

序事

太上有三元簡文，普弘慈救，幽明蒙澤，生死荷恩。上元金錄，爲國主帝王，鎮安社稷，保佑生靈，上消天災，下攘地禍，制御劫運，寧肅山川，摧伏妖魔，蕩除凶穢。或五星失度，四氣變常，二象不寧，兩曜孛蝕，天傾地震，川竭山崩，水旱爲災，螟蝗害稼，疫毒流布，兵革四興，猛鷲侵凌，水火漂灼，冬雷夏雪，彗孛呈妖，皆當於名山洞府，古跡神鄉，精備信儀，按遵科典，修金錄寶齋。拜天謝過，責躬引咎，思道祈靈，可以攘却氛邪，解銷災變。唯在精

苦殫罄，竭節輸誠，可致通感爾。經云，靈寶大乘，普度天人，福逮一切，存歿獲恩。皇文大字，通神降靈。三洞寶經，自然天文，並是度身升玄之法。修之者，馳騁龍駕，白日登晨；奉之者，身脫八難，免諸苦厄，七祖生天；見之者，精心信向，世生善緣。若修齋行道，明依具格，立感上玄科禁。

法式列之如左

金錄壇

外壇廣四丈五尺，高二尺。中壇廣三丈三尺，高二尺。內壇廣二丈四尺，高二尺。方壇共高六尺，法坤之數也。

都壇開十門，用長纂十二枚，短纂八枚。

中壇長纂十八枚，短纂八枚。八卦纂八枚別於壇外，四角，四正位安之。合用長纂三十八枚，各長一丈，出土九尺。短纂三十枚，各長七尺，出土六尺。三壇用纂六十八枚，纂各圍八寸，長者染漆黑白各五處，短者黑白各三處。作纂法用墨二挺，先墨後漆，用漆十斤，用芒一百五十把。打爲縛纂。令細纒紙百幅纏竹下，墨及漆竹用爲纂。無竹之鄉可用木作之，大七寸。圍長者，朱漆五處，墨漆五處。短者，朱漆三處，墨漆三處。纂頭刻爲蓮花獅子龍鶴神獸之形，五色裝飾也。縛纂用絳繩七十

五丈四尺七寸七分於壇上，兩重竹纂，勿闌門。用榜二十二枚，各廣三寸二分，長七寸四分。用二寸釘一百四十二枚釘榜，銅鐵竹釘，隨時所作。用三寸釘二十二枚釘榜著門檐及封纂。

亥爲天門，墨書青榜。巳爲地戶，赤書黃榜。寅爲日門，青書朱榜。申爲月門，白書黑榜。

右四門，施於外壇。

東方青華元陽門，朱書青榜。南方洞陽太光門，黃書赤榜。西方通陰金闕門，墨書白榜。北方陰生廣靈門，青書黑榜。東北通靈禁上門，白書黃榜。東南始陽生元門，白書黃榜。西南元黃高晨門，白書黃榜。西北九仙梵行門，白書黃榜。上方大羅飛梵門，青書黑榜，亥地。下方九靈皇真門，黃書赤榜，巳地。

右十門，施於內壇。

震宮洞青之炁，青書黃榜，卯地。離宮洞陽之炁，朱書白榜，午地。兌宮少陰之炁，白書青榜，酉地。坎宮洞陰之炁，黑書赤榜，子地。巽宮梵行之炁，黃書黑榜，東南角。坤宮梵陽之炁，黃書黑榜，西南角。乾宮梵通之炁，黃書黑榜，西北角。艮宮梵元之炁，黃書黑

榜，東北角。

右八卦榜，施於都壇之分，合二十二榜。

又用朱二兩，赤土三升染芒。綠青一兩半，胡粉十兩，黃丹一兩，墨三丸，漆五合，筆五管，外壇四尺薦席十六具。淨甌甌自制。中壇五尺薦席十二具。淨甌甌自制，又須長筵狹席，繞都壇外一周。又於壇內中央，安一高座，請經。又用一案，次高座，南請香火。又用案五枚，著四面四門及中央。又經堂內，須三案，香火三具。又用青紙五幅，朱書五方真文，置五方案上。真文本出玉訣上卷。又用金龍五枚，鎮五方真文上。又用香五鑪，並五奩，置案頭。又壇上合用案七張，鑪奩七具。又用漆合五枚，盛五方紋繒，著五方香案下。又用一案，置齋主本命紋繒，在三寶座前左邊。

然燈法

春則然九燈，亦可九十燈，亦可九百燈。夏則然三燈，亦可三十燈，亦可三百燈。秋則然七燈，亦可七十燈，亦可七百燈。冬則然五燈，亦可五十燈，

亦可五百燈。日平之月，則然十二燈，亦可百二十燈，亦可千二百燈。

右件，燈一依經法，但先師相承，指方別九燈，四九三十六燈，在壇外羅列。今宜依經，貴賤時節量之也。

又須安一長燈，長一丈九尺，出土。上然九燈，安內壇裏。近三寶座西北，上以照九幽長夜之府。

又於中庭安一百五十六燈，又須蠟燭，夜別七條。

凡禳灾度厄，用五色紋繒。天子正數，諸王公丈數，庶人纁繒尺數。東方青紋九，南方絳紋三，西方白紋七，北方皂紋五，中央黃紋十二。公侯本命一年加一丈，隨命色。又須本命之日，天子紫紋之繒，年別一疋。諸侯亦紫紋之繒，年別一丈。庶人纁繒，年別一尺。錢二萬四千亦一萬二千，亦二千四百。米一十二斛亦二石四斗。油一百二十斤亦一十二斤。又須金龍五枚，枚重一兩，天子用上金，諸王公用次金，庶人用下金。事訖，投於山水。

夫行道人，若依太真儀，天子須二十八人，諸王公十六人，庶人十四人。所以然者，為道心者稀，難堪福田。若有精進之士至多，亦宜貴賤量之。假令十四人，三日行道，用和

香四升，香炭丸三百枚，生綵五色花三升，用合子盛之，誦詠訖，分散之。手巾四枚懸齋堂前。又須香湯，人別一斛，浴巾二枚懸室前。則令淨密，不得敞露。齋竟，須黃素五尺書表。

夫行道日數，經云，春九日，秋七日，夏三日，冬五日。四季之日，十二日。又云，多少目適人所為，至於三日三夜，苦請丹心，亦感於諸夫，深自可量，節而行事。齋竟，投龍及施散法物，依經文。

右件，法用所須。若有所闕，考屬諸經，有明科不可輕闕。

齋日限滿，依別法言。功竟，燒真文。三日外，拜表謝恩竟，方落榜毀壇纂，都畢。

宿啓儀

安施即訖，尊卑相次。預皆沐浴薰香，新潔法服，簡履壇座。一一如法。列玄師之前，條疏職品，各司所任。都講鳴磬告衆，中外肅然。齋主投詞，或大臣為國，或帝王降命，皆有代拜。臣寮捧函投詞，師受詞關告，一

如常儀。

次三皈依頌

次華夏讚

次請三師讚

次旋行至地戶禁壇

次入戶呪

次升中壇天門

次上五方香晝東，夜北

次上御案香

次上香密呪

次上本位香

次各禮師存念如法存思如靈寶儀

次鳴法鼓二十四通

次發鑪

各稱法位

具法位，奉行金錄大齋法事。臣，某

等今故燒香，奉為社稷，尊靈宗祧，先聖皇帝，皇后皇太子，諸王公主，中外臣寮，天下人民，蜎飛蠹動，歸身歸神，歸命，大道十方無極太上靈寶天尊。普願天清地靜，日月貞明，萬國咸和，羣生昭泰，九幽寧息，長夜開光，身得道真，超凌三界，逍遙無上金闕七寶紫

微宮，永與道合。所啓玄感，上御至真，無極道前。

次禮十方從北為始

次長跪懺悔

臣衆等至心歸身，歸神歸命十方無極太上靈寶天尊。以今啓齋禮懺，懺悔宗廟尊靈。今皇帝皇后，皇太子，諸王公主，文武職寮，自從曠劫以來，至于今日，身心口業，無量無邊。因今初夜升壇，告齋朝懺，罪無巨細，咸乞蕩除。上願宗廟安寧，帝圖遐遠。聖躬萬壽，四海和平。率土普天，俱登壽域。幽明受福，蠢動霑榮。三業清夷，六情恬晏。同升福岸，俱契道真。至心稽首，正真三寶。

次三啓頌

次三禮

次旋行讀五方真文從東方始，訖於中方，還本位。上香，重稱法位，號其真文。如降誕節，即用第一節。如為星宿災變，用第二節。如為鬼神疾疫，用第三節。如為水災淫雨，用第四節。一如玉訣中告齋之時止，讀真文，未用都呪。都呪散壇用爾，衆官隨聲呪。

東方真文

東方九炁，始皇青天。碧霞鬱壘，中有老人。總校圖錄，攝氣舉仙。

南方真文

南方丹天，赤帝玉堂。中有大神，號曰赤皇。上炎流煙，三炁勃光。神仙受命，應運太陽。

西方真文

西方素天，白帝七門。金靈皓映，太華流氛。白石峨峨，七炁氤氲。上有始生，皇老大神。總領肺氣，主校九天。檢定圖錄，制召上仙。

北方真文

北方玄天，五炁徘徊。中有黑帝，雙皇太微。總領符命，仙鍊八威。青裙羽櫛，龍文鳳衣。上帝所舉，制到玉階。

中央真文

中央總靈，皇上天元。始生五老，中黃高尊。攝炁監真，總領羣生。典錄玄圖，宿簡玉文。催運輔氣，普告萬神。

重稱法位

高功具法位，奉行金籙大齋法事。
某嶽先生某帝真人臣，某等謹重上啓，太上無極大道太上大道君，太上老君，無上玄老十方靈寶天尊，已得道大聖衆，至真諸君丈人，三十六部尊經，玄中大法師天師君，上相上宰，四司五帝，三界官屬，一切真靈。臣等伏聞，大道開光，三乘御運，上聖垂化。三籙懸科，佐世安人，濟時行教。保寧邦國，匡祐帝王。凡有辭誠，理宜關奏。況奉詞旨，敢不上聞。

次讀詞

皇帝宿荷神休，誕膺景運，繼天立極，纂聖御時，期暢玄風，以康黎獻。尚慮生靈未泰，德教未孚。或賞罰乖宜，刑法失度。或陰陽舛繆，氣序愆調。唯罄丹誠，上祈玄感。竊惟乾坤主宰造化，職司三界真靈。諸天曹屬，舉善徹惡，定罪紀功，幽顯無遺，洪纖攸繫，列言奏簡，上御玄都。天尊垂鑒，祐之慈，衆聖降昭彰之澤。影隨響答，有感必通。是用虔設壇場，精修齋直，凝神滌慮，改操革情。依上元金籙簡

文明真科品，於某處某宮觀，奉爲皇帝，依威儀舊典，置立皇壇，四界八極，法天象地。披九光寶蘊，敷顯真文，招真降靈，以祈所願。謹齋金龍玉璧，紋綵命繒，油燭香花，事事如法。燒香行道，披心露形，然燈續明，照燭幽夜。臣等謹依齋法，宿以啓聞。恩惟太上三尊，十方衆聖，無上經寶，玄中大法師，靈寶至真，三界官屬，垂神鑒映，省覽所陳。乞敕勒監察曹屬、侍經威神、土地真官，一合同心，併力營衛，掃蕩內外，清淨壇場，降伏妖魔，馘滅精祟。使臣等心安神定，思念立感，啓奏上達，齋功成就，無有窒礙。臣等雖佩至真，參修大法，處身五濁，染跡六塵，三關未調，六情放蕩。仰賴禁戒，以檢身心，輒依齋科，說戒威儀。使同齋之人，咸遵法訓。須明旦晨曉，依法行道，續更啓聞，謹啓。

次智慧頌三首旋行至東方，各一拜。

次唱人各首體投地，心禮十方

方各一拜，從北爲始。

次云禮足，衆官平跪，說戒威儀

次說戒
次十二願
次復鑪

金籙齋啓壇儀

（陳耀庭點校）

003 金錄齋懺方儀

廣成先生杜光庭集

經名：金錄齋懺方儀。一卷。

唐末五代杜光庭集。底本出處：《正統道藏》洞玄部威儀類。

懺方儀

都懺

伏聞，元始開圖，闢五方而安鎮；真文演化，分十極以凝光。總萬象於神機，歸羣功於妙有。保寧邦國，孚祐帝王。延大寶於無疆，播鴻休於有截。今謹有皇帝融神道域，屬想玄津。思啓洪禋，下資萬寓。謹齋金龍玉璧、油燭香花、法信紋繒供養之具，請披玄蘊，敷露真文，歸命十方無極太上靈寶天尊、十極天君、諸天諸地三光五嶽一切神仙諸靈官。伏冀社稷尊靈，宗祧昭穆，遊神太極，晏景上清。友八帝於

丹陵，接五皇於絳府。垂芳萬葉，流睨九圍。皇帝繼聖勛，華紹蹤義嶽。寰區永泰，文軌大同。和玉燭於四時，叶珠囊於五緯。兆民康樂，百穀滋繁。長臻有道之風，克暢無爲之化。得道之後，升入無形，與道合真。

東方

臣等伏聞，勾芒律應，分淑氣於瑤臺；青帝令行，扇和風於玉樹。三光煦輻，九野氤氳。羽戢皆翔，鱗潛盡躍。凝輝六合，蠱類昭蘇。流貺八宏，羣生咸泰。謹有皇帝齋持法信，虔設道場，披露真文，奉修齋直。歸命東方無極太上靈寶天尊，九氣天君，東鄉神仙諸靈官。伏冀社稷尊靈，宗祧先聖，雲升三境，質蛻九清。謁羣帝於星闕，携列位於天路。皇帝四皇接軫，六帝齊猷。澤渚東溟，壽隆北極。寰中海外，俱沐玄休。有識含生，長承道化。兵戈戢息，風雨以時。五緯順常，兆人康泰。得道之後，升入無形，與道合真。

南方

臣等伏聞，朱陵火帝，開月殿而流輝；丹霍天君，含日精而散彩。御絳霄而演教，聖人光得一之符；居赤明以敷經，天子啓通三之曆。大弘玄訓，作範將來。爲邦國之津梁，實幽明之舟楫。今謹有皇帝齋持法信，虔設道場，披露真文，奉修齋直。歸命南方無極太上靈寶天尊，三氣天君，南鄉神仙諸靈官。伏冀社稷尊靈，宗祧先聖。五華芝蓋，應神於流火之庭；三素雲輶，遊觀於明霞之府。皇帝垂衣化表，端拱寰中。闢象魏而納萬方，固龍圖而寧九有。三辰叶度，四序調年。烽燧不驚，休祥自降。俗躋仁壽，化洽雍熙。幽夜窮泉，飛行蠱動，克承明祐，咸保物宜。得道之後，升入無形，與道合真。

西方

臣等伏聞，鬱察仙官，金真校長生之籙；浮羅寶觀，玉帝懸度世之科。大啓真宗，發輝聖緒。弘龜鼎之祚，光鳳曆之尊。導羣品於靈臺，乘霓廣漠；引含生於淨域，羽駕太清。今謹

有皇帝齋持法信，虔設道場，披露真文，奉修齋直。歸命西方無極太上靈寶天尊，七氣天君，西鄉神仙諸靈官。伏冀社稷尊靈，宗桃先聖，躡金霞而駕景，乘玉輅以參真。證品天階，延休帝業。皇帝崑丘比壽，兌澤齊貞。握三鏡以君臨，盡萬方而撫御。五風十雨，自叶於農祥；舜日堯雲，克彰於睿德。兵鋒偃戢，夷夏昭蘇。乾坤永清，億兆同泰。得道之後，升入無形，與道合真。

北方

臣等伏聞，鎮嶽標奇，據陰方而作固；玄丘聳翠，當北陸以居尊。生一氣以含元，分三才而會道。仰扶天度，上保宸居。爰司罪福之門，以顯幽明之位。今謹有皇帝齋持法信，虔設道場，披露真文，奉修齋直。歸命北方無極太上靈寶天尊，五氣天君，北鄉神仙諸靈官。伏冀社稷尊靈，宗桃上聖，挹靈津於紫府，御瓊鳳於玄洲。貽貺億千，傳光海嶽。皇帝功包九有，聖叶三無。廓溟海以流恩，並極星而御衆。

金芒玉弩，永消兵甲之灾；天象人文，自契升平之運。三邊靜肅，九稼豐穰。動息飛沈，咸承景化。得道之後，升入無形，與道合真。

東北方

臣等伏聞，一氣初分，天道運而無極；三光肇映，品物形而有倫。呈玉相於寅方，散金輝於艮域。翼朱綈之景命，爰福帝圖；開綠錯之禎文，以康天步。今謹有皇帝齋持法信，虔設道場，披露真文，奉修齋直。歸命東北方無極太上靈寶天尊，梵氣天君，東北鄉神仙諸靈官。伏冀社稷尊靈，宗桃列聖。飛步於青元之境，乘真於碧落之臺。潛播神功，允昌休祚。皇帝六符應象，萬寓宅心。睿明侔鳥兔之暉，天壽等乾坤之固。外宣文德，旁振武威。稼穡有年，烽烟罷警。九幽六趣，同均浩蕩之恩；絕域窮荒，共沐雲雷之澤。得道之後，升入無形，與道合真。

東南方

臣等伏聞，石闕端旒，儼仙姿於異境；銅階踐極，凝真相於梵宮。洪濤

浮不夜之庭，金霧鎖長生之嶽。三壺列翠，九海澄光。齊帝道於茲方，順朝宗於百谷。今謹有皇帝齋持法信，虔設道場，敷露真文，奉修齋直。歸命東南方無極太上靈寶天尊，梵氣天君，東南鄉神仙諸靈官。伏冀社稷尊靈，宗桃先聖。涉鯨津而永驚，羽衛參差；指鼇嶺以長遊，雲程縹緲。皇帝光敷大號，遐鼓皇風。超農燧以揚徽，掩軒融而縱聖。三光調理，五緯順常。俗致和平，人登富壽。幽明庶類，同洽玄恩。得道之後，升入無形，與道合真。

西南方

臣等伏聞，金真撫運，朗金鏡於申郊；玉聖御時，明玉燭於坤境。玄功幽贊，保億載之宏圖；至德潛符，揚七百之遐祚。神休克被，景命惟新。今謹有皇帝齋持法信，虔設壇場，披露真文，奉修齋直。歸命西南方無極太上靈寶天尊，梵氣天君，西南鄉神仙諸靈官。伏冀社稷尊靈，宗桃昭穆。登大明之府，出沈默之鄉。延嘉貺於孫謀，需玄滋於帝室。皇帝嵩衡比壽，日月

齊華。運乾德以君臨，配坤輿而安靜。神皋帝籍，自表於有年；偃革弢弓，永臻於至理。羣生遂性，萬國乂康。得道之後，升入無形，與道合真。

西北方

臣等伏聞，金墉千里，拱宸極以高居；琳闕九重，峙乾郊而作鎮。仰三成於崑嶠，控六紀於戌鄉。乃真靈之所都，實帝道之攸則。今謹有皇帝齋紋繒法信，龍璧香華，披露真文，奉修齋直。歸命西北方無極太上靈寶天尊，梵氣天君，西北鄉神仙諸靈官。伏冀社稷尊靈，宗桃上聖。御蚪驂於天路，肅羽衛於雲衢。縱賞九清，傳徽萬葉。皇帝凝旒體道，指玄圃以長尊；負宸乘乾，與珠衡而永正。化歸清靜，歲叶豐登。鋒鏑不飛，禎祥允集。含靈有識，咸契真階。得道之後，升入無形，與道合真。

上方

臣等伏聞，至道融精，惟天爲大。覆三千而不宰，包五億以高臨。垂象無私，運行靡息。克昌景化，以福帝

圖。今謹有皇帝齋持法信，敷列壇場，披露真文，奉修齋直。歸命上方無極太上靈寶天尊，玉京玄都紫微金闕三清三界上聖高尊，上鄉神仙諸靈官。伏冀社稷尊靈，宗桃先聖。霓旂高舉，逍遙三境之中；鶴馭遐升，放曠六虛之上。皇帝體元立極，以道乘圖。邁三五之風猷，傳億千而遠大；與儀璘而並耀，配九六而永貞。萬寓咸寧，兆人康泰。兵鋒不試，文德允孚。凡曰幽明，共升道域。得道之後，升入無形，與道合真。

下方

臣等伏聞，厚載之功，寔惟坤德。廓八紘而有截，生萬類以無私。鼇浦鵬池，旁分固護。十山五嶽，遐布威靈。弘大寶於中都，總羣休於上國。今謹有皇帝齋持法信，虔設道場，披露真文，奉修齋直。歸命下方無極太上靈寶天尊，十二仙君，九宮真人，無極世界嶽瀆神仙諸靈官。伏冀社稷尊靈，宗桃先聖。三山八洞，遠奉宸遊，丹霍青丘，繼登真格。皇帝克明睿德，

永御中天。運玉斗以撫臨，闢瑤圖而端穆。三辰皎潔，長環北極之尊；九地浩茫，允福南山之壽。干戈不作，穀稼惟豐。動植幽明，常臻道化。得道之後，升入無形，與道合真。

金錄齋懺方儀

（陳耀庭點校）

004 金錄大齋宿啓儀

經名：金錄大齋宿啓儀。一卷。
底本出處：《正統道藏》洞玄部
威儀類。

各禮師存念如法

東方

九炁青天，明星大神。煥照東鄉，洞映九門。轉燭陽光，掃穢除氛。開明童子，備衛我軒。收魔束妖，上對帝君。奉承正道，赤書玉文。九天符命，攝龍驛傳。普天安鎮，我得飛仙。

南方

南方丹天，三炁流光。熒星轉燭，洞照太陽。上有赤精，開明靈童。總御火兵，備守三宮。斬邪束妖，翦截魔兇。北帝所承，鋒火八衝。流鈴交煥，敢有不從。正道流行，我享上功。保天安鎮，億劫無終。

西方

七炁之天，太白流精。光耀金門，洞照太冥。中有赤皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛升紫庭。靈寶玉字，溥惠萬生。功加一切，天地咸寧。

北方

北方玄天，五炁徘徊。辰星煥爛，光耀太微。黑靈尊神，飛仙羽衣。備守五門，檢精捕非。敢有干試，豁落斬摧。玉符所告，神真八威。邪門閉塞，正道明開。映照我身，三光洞輝。策空駕景，舉形仙飛。

中央

黃中理炁，總統玄真。鎮星吐輝，流煥九天。開明童子，一十二人。元炁陽精，炎上朱煙。洞照天下，及臣等身。百邪摧落，攝鬼萬千。中山神呪，溥天自然。五靈安鎮，身飛上仙。

鳴法鼓二十四通

無上三天玄元始三炁太上老君，召出臣身中三五功曹、左右官使者、左

右捧香驛龍騎吏、侍香金童、傳言散花玉女、五帝直符直日香官，各三十六人出。出者，嚴裝顯服，冠帶垂纓。關啓玄壇土地，方域神真。臣今宿啓告齋，建壇闡事。謹爲入意其諸丹悃，具載緘膽。願得太上至真道炁、靈寶瑞光下降，流入臣等身中。令臣所啓之誠，速達徑詣至真無極大道、三清上聖，昊天玉皇上帝御前。

請稱法位

具法位臣，某今故燒香，願以是香功德，上祝皇圖鞏固，聖壽綿長。薰陶仁厚之風，垂拱太平之治。溥爲藩屏王侯、土地官長。臣等三師五友，異代學真，谷隱巖棲，門徒祭酒，以至三軍萬姓，天下人民，動植飛潛，無邊含識，歸身歸神歸命太上十方靈寶自然至真無極大道。特乞赦原三業六根，無邊罣咎，得親正教，同沐深恩。身得道真，歌詠太平。同躋仁壽，逍遙無爲。永與道合，所啓玄感，應聲上御至真無極道前。

起敬讚